

四庫全書

經部

欽定四庫全書

經部

易酌卷九

詳校官鴻臚寺少卿_臣梁業陽

通政使司副使_臣莫瞻菴覆勘

總校官檢討_臣何思鈞

校對官中書_臣葉蘭

謄錄監生_臣張護

欽定四庫全書

易酌卷九

周易下經



震下
震上

震亨震來虩虩笑言啞啞震驚百里不喪匕鬯

一震卦也或說的凜然可畏使人有不敢即安之意
或說的安然無事使人有吾何畏彼之意讀者當自

祁州刁包撰

得之震者一陽動於二陰之下也傳曰陽生於下而
上進有亨之義又震為動為恐懼為有主震而奮發
動而進懼而修有主而保大皆可以致亨故震則有
亨如此說其義始備震之來也虩虩然傳以為顧慮
不安之貌曰蠲虎謂之虩者以其周旋顧慮不自寧
也本義恐懼驚顧不出傳意傳以笑言啞啞為言笑
和適之貌而必曰處震如是則能保其安裕是虩虩
正所以啞啞也梁溪先生曰坦坦蕩蕩從兢兢業業

得來正是此理震為雷雷之震聲聞百里人恒懼而
自失唯祭祀者不然也以鼎實升俎鬯以灌地降神
祭祀之事也祭祀之事以一心對越神明雖雷轟於
前而罔聞故不喪匕鬯也傳曰臨大震懼能安而不
自失者唯誠敬而已此處震之道也昔先生渡河舟
幾覆舟中人皆號叫先生獨安坐自若既渡或問之
對曰心存誠敬耳此正其驗也朱子曰言人常似那
震來時號號地便能笑言啞啞到得震驚百里時也

不喪匕鬯這箇相連做一串說下來

謹按乙巳之夏家兄宰上元予代收瓜埠官田麥租
回時渡江尚未及半而風浪大作舟為顛側不寧水
自窓中潑入者再從行皆无人色予自若也已而抵
燕子磯有老吏袁某請曰適間事且不測獨不動聲
色何也予曰人之可自主者恃此心耳今日舟中予
乃若輩之心也若不自持汝等必大驚惶舵工懼而
失手立見顛覆矣且茫茫大江兩岸相距皆七八里
徒驚擾无益也不如安坐不動若輩猶可恃以无恐
耳其人首肯雖未敢竊比程
先生然而其事頗頗故及之

彖曰震亨

本義曰震有亨道不待言也震來虩虩一句釋震字

笑言啞啞一句釋亨字震驚百里不喪匕鬯二句又
總釋震亨故不待言也

震來虩虩恐致福也笑言啞啞後有則也

震來虩虩豈徒多懼已哉知過而有令圖天佑之矣
故曰恐致福也笑言啞啞豈徒自若已哉循理而无
過舉畏天者也故曰後有則也都是進一步說

震驚百里驚遠而懼邇也出可以守宗廟社稷以為祭
主也

本義謂出可以守句上
宜有不喪匕鬯四字

遠者驚邇者懼雷之震天之威也丘氏曰驚者卒然
遇之而動乎外懼者惕然畏之而變于中分疏最確
不喪匕鬯句脫如傳說或曰出即鬯字之誤非也本
義曰出謂繼世而主祭是就君說傳曰以長子之義
通解之謂其誠敬能不喪匕鬯則君出而可以守宗
廟社稷為祭主也還是就長子說按易乾為人君之
象震為長子之象主器莫若長子序卦有明文矣疏

曰出謂君出巡狩等事也君出則長子留守宗廟社稷攝祭主之禮事也當以此說為正

象曰洊雷震君子以恐懼修省

內外兩體俱震重襲之義故曰洊雷聞雷之洊而恐懼者恒情也君子非特恐懼而已有修省之寔功焉恐懼是修省的本體修省是恐懼的工夫外考諸應事接物之際得无有含糊不堪問已者與內考諸處心積慮之微得无有暗昧不堪告人者與惴惴焉常

若上无以對天下无以對鄉里遠无以對聖賢近
无以對妻子其嚴乎傳曰君子畏天之威則修正其
身思省其過咎而改之尤為醒切又曰不惟雷震凡
遇驚懼之事皆當如是余又從而進之曰不獨驚懼
雖遇歡悅之事亦然禍之來也固恐其有以召之福
之來也又懼其无以當之那一件可輕易放過昔人
所謂淵默雷聲也曾子日事三省之功而其所自述
則曰戰戰兢兢如臨深淵如履薄冰其得潛雷之義

者乎人知其善用詩而不知其善用易也

初九震來虩虩後笑言啞啞吉

初為成卦之主可該全體故爻辭與卦辭同只加後字言畏懼于前乃能安樂于後也爻之吉即卦之亨也然重申再告不憚諄復无非示人以恐懼修省之意耳

象曰震來虩虩恐致福也笑言啞啞後有則也

焦氏云福由恐致然福非外至也意思安閒笑言啞

啞而已啞啞又非侈然自放也循其法則不失常度而已聖人之所謂福者如此笑言啞啞即在震來虩虩中震驚百里虩虩也不喪匕鬯笑言啞啞也原不可分先後至彖傳與初爻加一後字又是一意蓋非恐懼无以致安樂所以足前言之所未備互相發也其說甚好存之

六二震來厲億喪貝躋于九陵勿逐七日得

二以柔順中正居初之上初一陽上進其鋒不可當

岌岌乎殆矣故曰震來厲程傳億作度本義未詳余
謂十萬曰億極言數之多也億喪貝言大喪其貨貝
也近閱訂詁已先得我心矣從來避患者恒戀戀於
所有故未能割去必貨貝无所愛然後能全身遠害
也如張子房不愛萬金之貲是也躋于九陵升于九
重之高陵也勿逐即書勿敢越逐之逐既喪而有悔
心焉則逐之矣二中正自守无容心于其間物極數
過則有復反之理七日得言可計日而取也傳云卦

位有六七乃更始故曰七日或曰自二至上又自上而二七數亦通

謹按億大也觀六五象曰大无喪可見二至九四為艮陵之象也在初九之上九陵之象也喪貝而躋陵隆甑不顧也七日而可得去珠復還也

象曰震來厲乘剛也

二所以厲者下乘初九之剛故也乘剛而不早為之所難以免矣

六三震蘇蘇震行无眚

三不中正遇震而不能自立者也蘇蘇傳云緩散自失之狀本義因之竊意震懼之極生氣僅存如所云絕而復蘇是也陰不正而陽正去三以就四反正之道故无過青也李氏曰陽爻震物陰爻被震陰被震而不敢輕犯其鋒必須逃避而後獲免故二則欲其躋于九陵三則欲其行无咎此說甚妙

象曰震蘇蘇位不當也

以陰居陽為不當居不當行則當矣

九四震遂泥

四與初同為震之主初動而二陰辟易其震為有權
四動而重陰掣肘其震為无威遂泥者陷于四陰之
中而不能自拔也遂即春秋遂伐楚遂入越之遂言
其竟陷于泥也傳曰遂者无反之意泥滯溺也本義
因之

象曰震遂泥未光也

陽剛有光明之才震動有光顯之勢徒以處柔而不

中正遂為四陰所制曖昧无色故曰未光也

六五震往來厲億无喪有事

六五當震之時往則上以柔居動之極來則四以剛為動之主往來无安止之地危厲亦甚矣然以柔居剛而有中德中則不失其正故无喪而有事也有事者居中用中之事也傳曰二五雖不當位多以中為美三四雖當位或以不中為過中常重于正也盖中則不違于正正不必中也天下之理莫善于中于六

五可見學易者不可不知此理

象曰震往來厲危行也其事在中大无喪也

上行危下行亦危危行也其事在固守其中故无喪
二喪貝五无喪中德同而初四之剛異也傳以无喪
為大竊意大即春秋書大有大去之大猶云全也盡
也所以釋億字之義也

上六震索索視矍矍征凶震不于其躬于其鄰无咎婚
媾有言

上以陰柔處動之極志氣消索殆盡故曰震索索心
驚而目眩顧盼張惶故曰視矍矍以索索矍矍之狀
而欲有行其凶必矣震四也遠上不于其躬也近五
于其鄰也禍患尚未切身及此而能恐懼修省則鄰
之震不至為躬之震矣故无咎三者上之婚媾也无
應故有言傳曰六居震之上始為衆動之首今乃畏
鄰戒而不敢進與諸處震者異矣故婚媾有言也
象曰震索索中未得也雖凶无咎畏鄰戒也

中未得傳作中道本義作中心盖中心有未安也故
見于外者爾爾以陰柔之才當震極之地雖凶而无
咎者因震鄰之恐用以自戒故也不能競競于始而
能競競于終震極則知變耳



艮下
艮上

艮其背不獲其身行其庭不見其人无咎

程子曰看一部華嚴經不如讀一艮卦以耽空守寂
為艮便入禪學矣故言止即言行言靜必言動只要

事事到恰好處便是艮卦之義艮其背傳云止于所
不見也朱子以為誤極辨之謂身動物也唯背為止
艮其背則止于所當止也止于所當止則不隨身而
動矣是不有其身也如是則雖行于庭除有人之地
而亦不見其人矣蓋艮其背而不獲其身者止而止
也行其庭而不見其人者行而止也動靜各止其所
而皆主夫靜焉所以得无咎也其義甚精然程傳之
理終不可廢故又引入近思錄中昔唐太宗除咎背

法以為人之五臟皆附于背然則背也者无思无為而為諸體之總會故曰所也止于是所謂于止知其所止也內見有已未免有繫戀處不獲其身內不見有已也外見有人未免有瞻顧處行其庭不見其人身不見有人也已兩忘而止于至善故无咎也艮其背行其庭雖對說却以艮其背句為主蓋卦義三字盡之矣故彖傳先發此句之義而後以三句總結之也

象曰艮止也時止則止時行則行動靜不失其時其道
光明

本義曰此釋卦名艮之義則止也然豈塊然不動之
謂哉時可以止則止止之時止也時可以行則行行
之時亦止也行動也止靜也行止以身言動靜兼心
言也時止時行動靜不失其時也傳曰在物為理處
物為義動靜合義理乃為不失其時如此時字始有
着落或問艮之象何以為光明朱子曰定則明凡人

胸次煩擾則愈見昏昧中有定止則自然光明莊子
所謂泰宇定而天光發是也胡氏曰艮一陽見于二
陰之上陽明著見陰莫得而掩蔽之故艮獨稱光明
二說正互相發

艮其止止其所也上下敵應不相與也是以不獲其身
行其庭不見其人无咎也

艮其止即以止當背也或曰背字之誤不必傳曰止
而不得其所則无可止之理夫子曰于止知其所止

謂當止之所也其義甚精又曰夫有物必有則又止于慈子止于孝君止于仁臣止于敬萬物庶事莫不各有其所得其所則安失其所則悖聖人所以能使天下順治非能為物作則也唯止之各于其所而已其義甚大上下二體如兩山分峙而立相背不相向故相敵不相與也如各人做各人職事各人盡各人道理无雷同依附之迹是以內不見己外不見人而无咎也

象曰兼山艮君子以思不出其位

兩山相並故曰兼山重艮之象也君子觀重艮之象而屹乎如山无越思焉思不出位即所謂素位而行不顧乎外也如居富貴之位便思富貴的道理稍有越思虧却本分事情矣以至貧賤夷狄患難莫不皆然盖一念悠忽便是廢思一念紛擾便是思出其位位以言乎其分也若夫以體言則曰背以理言則曰所思其位正以止其所也止其所正以艮其背也傳

曰當行而止當速而久或過或不及皆出其位也況踰分非據乎此義又進一層蓋卦爻俱從身說大象又歸本于心故不出其位而必曰以思昔人所稱山中宰相弗思耳

初六艮其趾无咎利永貞

初居艮之最下趾之象也趾主行艮其趾止而不行也與壯于前趾者異矣故曰无咎陰柔之才慮其止于始而未能止于終也故又戒以永貞之利

象曰艮其趾未失正也

以陰居陽非得正也方艮之初行則不正止則正止而不敢妄動猶未至于失正也未失正故既以无咎許之而又以永貞望之

六二艮其腓不拯其隨其心不快

二與五非正應失其主矣三以成艮之主橫亘其上
是二之主不在五而在三也二之進退不能自主而
聽于三猶腓之進退不能自主而聽于股也故為艮

其腓之象三過剛不中二柔順无能改于其德其勉而隨之也豈得已哉其心當有鬱鬱不樂者形迹之間似涉浮沉其心則曉然可諒也或曰傳云不拯而唯隨也唯字未的當信然

象曰不拯其隨未退聽也

本義云三止于上未肯退而聽乎二可見不拯其隨咎不在二而在三也爻既為二原情象復為三著罪是皆春秋筆意也

九三艮其限列其夤厲薰心

三以剛居剛一陽橫亘中間有艮其限之象上下四陰皆為隔絕有列其夤之象限腰胯也分而為上下則脈絡不相流通夤脊骨也列而為左右則營衛不相統屬矣全體痞結心居中无所依附如焚如灼故曰厲薰心傳曰人之固止一隅而舉世莫與宜者則艱蹇忿畏焚撓其中豈有安裕之理厲薰心謂不安之勢薰燥其中也

象曰艮其限危薰心也

象但用危字易厲字慨嘆一番言剛而絕物流毒遂至此也絕物者適所以自絕耳

六四艮其身无咎

傳云四居大臣之位僅能善其身无取之甚也看爻辭云无咎殊无不足之意本義以陰居陰時止則止之說亦未確張氏云四正當心位不言心而言身心不可見身者心之區宇也觀其身之止則知其心之

止故无咎此說得之矣

象曰艮其身止諸躬也

爻曰艮其身象傳恐人誤認身為正面故以止諸躬釋之僂身為躬說文窮從呂從身呂背脊也蓋止諸躬即艮其背也艮其背則不獲其身矣象辭進一步說以補爻辭之所未備與文王卦旨正合

六五艮其輔言有序悔亡

五君位發號施令使天下各止其所者也其位適當

輔處故以輔言輔頰之兩旁骨背後可得而見者見其兩輔之不動則知其口之不言矣咸其輔尚口也艮其輔塞兌也義正相反慎默簡重有不言言必中節矣故曰有序言有序者有倫次有條理德音秩秩也輕發躁出則有起羞之悔艮而有序其悔亡矣本義云悔謂以陰居陽

象曰艮其輔以中正也

傳依本文解曰言以得中為正止之于輔使不失中

乃得正也本義曰正字義文叶韻可見則只以居上卦之中言之

上九敦艮吉

五爻皆取象于身至上九在艮山之極為成艮之主非但无咎悔亡而已也故不從人身取象而曰敦艮吉傳曰人之止難于久故節或移于晚守或失于終事或廢于久人之所同患也九能敦厚于終止道之至善也故六爻之德唯此為吉

象曰敦艮之吉以厚終也

敦艮之吉節以久而益貞守以久而益堅事以久而益勵故曰以厚終也



艮下
巽上

漸女歸吉利貞

巽長女在外未成婦也艮少男在內未親迎也故其義為漸本義云為卦止于下而巽于上為不遽進之義有女歸之象焉最精又自二至五位皆得正初終

二爻雖不當位然陽上陰下亦得尊卑之正位也故
曰女歸吉也女歸必以漸也女子生而願為之有家
故以嫁為歸詩之子于歸春秋王姬歸于齊无貴賤
一也傳曰天下之事進必以漸者莫如女歸臣之進
于朝人之進于事固當有序不以其序則陵節犯義
凶咎隨之然而禮義廉恥之重天下國家之本无若
女之歸故專以此取義六禮不備貞女不行故女歸
之利在貞也在禮聘則為妻奔則為妾不貞則奔可

乎傳曰諸卦多有利貞而所施或不同有涉不正之義而為之戒者有其事以貞乃得其宜者有言所以利者以其有貞也所謂涉不正之疑而為之戒者損之九二是也處陰居說故戒以宜貞也有其事必貞乃得宜者大畜是也言所畜利于貞也有言所以利者以其有貞者漸是也言女歸之所以吉利于如此貞正也蓋其固有非設戒也學易須如此分疏始得彖曰漸之進也女歸吉也

本義云之字衍衍之字則與晉无異矣傳註于之字俱有解固是若如本義作漸字更確女歸吉女以漸歸故吉也

進得位往有功也進以正可以正邦也

進得位以卦變言本義曰自渙而來九進居三自旅而來九進居五皆為得位之正傳曰乾坤之變為巽艮巽艮重而為漸在漸體而言中二爻交也由二爻之交然後男女各得正位蓋下體本坤陽進居上而

為艮上體本乾陰進居下而為巽進得陰陽之正位
故往有巽艮之功也進以正諸家多泛說非是宜緊
根上句來進得位則男正位乎外女正乎內矣進以
正也進以正則夫夫婦婦而家齊家齊而國治天下
平矣故曰可以正邦也進以正即進得位可以正邦
即往有功也此釋利貞之義也

其位剛得中也

剛得中指九五言以陽剛中正居尊位也傳曰諸爻

之得正亦可謂之得位矣然未若五之得尊位故特言之此釋卦體也訂詁云但取畫之陰陽更不論卦之男女也此義亦宜知

止而巽動不窮也

艮止于內而巽以行之動而不過故不窮也傳曰人之進也若以欲心之動則躁而不得其漸故有困窮也在漸之義內止靜而外巽順故其進動不有困窮也此釋卦德也

象曰山上有木漸君子以居賢德善俗

語曰十年之計樹木非積有歲年未遽高也故山上有木為漸進之象君子觀其象以居賢德法艮之止也善俗法巽之入也本義曰二者皆當以漸而進此兩平說傳曰人之進于賢德必有其漸習而後能安非可陵節而遽至也在已且然教化之于人不以漸其能入乎移風易俗非一朝一夕所能成故善俗必以漸也此兩截說竊意串說亦是韓退之曰陽子居

于晉之鄙薰其德而善良者幾千人善俗之說也君子以移風易俗為己任俗而善雖小人共勉為君子俗而不善雖君子漸墜為小人然非居賢德不可居者安土而不遷也本之躬行積久而後效見所謂涵育薰陶俟其自化也此漸之義也然史曰居德則忌何也史之象以德及人而不自有漸之象自有其德而後及人也

初六鴻漸于干小子厲有言无咎

從來有序者必稱鴈行以其不失次也親迎者必先
奠雁以其不亂羣也漸進之義從夫之道皆于是乎
見之故六爻皆取鴻象或曰木落南翔水泮北徂其
往來也有時亦漸之象也初陰柔居下上无應援漸
于干之象也干水涯也漸于干戢翼以俟時耳小子
未更事之稱見已然不見未然危懼有言愛鴻也非
知鴻也然鴻固无咎也傳曰君子深識遠照知義理
之所安時事之所宜處之不疑小人幼子非能燭理

故有言蓋不知在下所以有進也用柔所以不躁也
无應所以能漸也若漸之初而用剛急進則失漸之
義不能進而有咎必矣其義甚精

象曰小子之鴈義无咎也

小子之鴈以為未得所安耳不知始雖翅垂終當翼
振于守身之義為无咎也

六二鴻漸于磐飲食衎衎吉

二柔順中正上得九五之君為之應其進安且裕矣

故有漸于磐之象傳曰磐石之安平者江河之濱所有進至是不復如干之厲而有言矣宴息得所飲啄自如吉可知也

象曰飲食衎衎不素飽也

傳曰爻辭以其進之安平故取飲食和樂為言夫子恐後人未喻使伴食輩得以藉口故以不素飽釋之言其以伐檀之君子為和羹之大人也楊誠齋曰食君之祿又豈素飧云乎亦欲置國家于磐石之安納

人民于和衍之樂而已故傳說之志在中興有商而
非后則不食其祿孟子之志在平治天下而食前方
丈則得志不為絕好名理昔王曾大魁天下或戲之
曰狀元試三場一生喫着不盡公正色曰曾平生之
志不在溫飽庶幾此文之義矣

九三鴻漸于陸夫征不復婦孕不育凶利禦寇

傳云安處平地則得漸道本義云鴻水鳥陸非所安
也本義為是三過剛不中上无正應處非其據故有

漸于陸之象三四相比不相應非耦也三比四則夫
征不復如魯公孫敖從紀氏楚子反從夏姬之類四
比三則婦孕不育如楚鬬伯比不育穀於兔之類鴻
失匹則不再配三四夫婦如此愧漸陸之鴻多矣非
理相從者寇也比則不利禦則利三以過剛之才當
艮止之極故以禦寇勉之傳曰守正以閑邪所謂禦
寇也胡氏曰當合卦爻辭觀之卦辭女歸吉者以三
四兩爻也爻辭夫婦凶者亦三四兩爻也卦以兩體

論巽女有歸艮男之象爻以應否論當相應之位者
為正不當相應之位者為邪四女无歸三男之禮也
特相比而相得為私情之相合耳易之取義不同如
此

象曰夫征不復離羣醜也婦孕不育失其道也利用禦
寇順相保也

傳以為好醜之醜疏曰醜類是也言三與初二雖有
陰陽之殊同體艮卦故謂之羣醜也外比則內離矣

四无嫌而合失夫婦之正道也孕其敢育乎從寇逆也禦寇順也三與二協力同心以禦失道之寇則醜類合矣故曰順相保也順保即守望相助之意傳曰君子之于小人比也自守以正豈惟君子自守其已而已乎亦使小人得不陷于非義是以順道相保禦止其惡故曰禦寇或曰雁羣不亂飛則列陣相保亦有禦寇象

六四鴻漸于木或得其桷无咎

焦氏云乘剛不安之說殊无干涉非也鴻趾連不能握枝漸于木不安甚矣柔而乘剛之象也或得橫平之柯處之則轉危為安而无咎矣蒙引曰或得者言有此而庶幾可望之辭也最得或字之義傳曰四居正而巽順宜无咎者也必以得失言者因得失以明其義也

象曰或得其桷順以巽也

四在巽體之下而又以陰居陰順以巽也順以巽故

得桷也傳曰桷者平安之處求安之道唯順與巽若其義順正其處卑巽何處而不安如四是也

九五鴻漸于陵婦三歲不孕終莫之勝吉

五以陽剛中正居尊位漸于陵之象也陵視于陸于磐高矣而遠于水亦非安也二漸磐在江河之濱與五正應而為三四所隔故有此象也傳曰三比二四比五皆隔其交者也婦謂二二為五之婦也中遭隔絕獨陰不成其能孕乎焦氏云歷三位而後至故有

三歲不孕之象然三四以邪比二五以正應邪不勝
正故曰終莫之勝也傳曰以不正而敵中正一時之
為耳久其能勝乎在四既以邪正為安危在五又以
邪正為勝負而即以邪正為吉凶也學易者可以觀
矣

象曰終莫之勝吉得所願也

二五相應其所願也若為三四所勝則失願矣豈知
天道人心終有反正之理乎故信其必得也

上九鴻漸于陸其羽可用為儀吉

傳曰安定胡公以陸為達達雲路也謂虛空之中爾
雅九達謂之達達通達无阻蔽之義本義云以韻讀
之良是五爻皆以進而止上則翱翔天際故有漸于
達之象處漸之終巽之極雖无位而有用也其羽可
用為儀吉本義云儀羽旄旌纛之飾也按羽之用雉
取其綵鷺取其白鴻取其知時上九之儀取其秩序
非取其文明也傳曰在人則超逸乎常事之外者也

進至于是而不失其漸賢達之高致也故可用為儀
法而吉也傳義甚確

象曰其羽可用為儀吉不可亂也

本義云其志卓然豈可得而亂哉傳云可用為儀以
其有序而不可亂也觀鴻之飛從容閒適後先秩然
莫之或紊所謂其儀不忒者也不亂言其儀度非言
其志意也本義解爻辭切鴻恐未切上九解象辭切
上九恐未切鴻不如傳說的完美自古高尚一流天

子不得臣諸侯不得友然或一意枯寂如長沮桀溺
之流其羽不可用為儀也或一意放曠如竹林七賢
之流其羽不可用為儀也超然物外以禮自守容止
可觀進退可法瑟僖間赫喧儼然為一代之師表焉此
大賢以上之事非幽人達士所可幾及也



兌下
震上

歸妹征凶无攸利

歸妹亦女歸也而義各不同盖漸與歸妹相對而相

反之卦也漸巽上艮下少男下長女而長女歸于少男也故曰女歸剛先求于柔陽先求于陰是以貞吉无不利歸妹震上兌下少女悅長男而長男歸于少女也故曰歸妹柔先求于剛陰先求于陽是以征凶无攸利男感而女應則正女感而男應則邪此漸歸妹之分也不以理而以欲不以道而以情將傷身敗德故曰征凶失尊卑之序拂剛柔之常无所往而可也故曰无攸利

彖曰歸妹天地之大義也天地不交而萬物不興歸妹
人之終始也

歸妹卦本不好聖人却說出許大道理來此泛言男
女交感之理也一陰一陽之謂道物无獨生而獨成
者故男有室女有家天地之常經是乃其大義也震
長男天交于地之始兌少女地交于天之終天地不
交則人類滅絕萬物何由而興乎是故天地之道寄
諸男女男女之道合乎天地也古往今來繩繩相續

人所以始而終終而復始者以歸妹故也猶禮云大昏萬世之嗣也本義云歸者女之終生育者人之始固自切貼

說以動所歸妹也

女悅而男動悅以動也所歸妹言所歸在妹也歸者妹寔主之而長男不與焉

征凶位不當也无攸利柔乘剛也

中四爻俱陰上陽下初二爻亦如之位不當也三

乘二五乘四柔乘剛也從未有男子制于婦人之手而家道克有成者傳曰男女有尊卑之序夫婦有唱隨之禮此常禮也如恒是也苟不由常正之道徇情肆欲唯說是動則夫婦瀆亂男牽欲而失其剛婦狃悅而忘其順如歸妹之乘剛是也所以凶无所往而利也

象曰澤上有雷歸妹君子以永終知敝

雷動于上而澤水為之搖漾似女悅以從男之象故

為歸妹君子觀其象而知始合不以正必有中道棄
捐之悔氓之蚩蚩所為作也傳曰夫婦之道當常永
有終必知其有敝壞之理而戒慎敝壞謂離隙歸妹
悅以動者也異乎恒之巽而動漸之止而巽也少女
之悅情之感動動則失正非夫婦正而可常之道久
必敝壞知其必敝則當思永其終也其義醒矣再由
夫婦之道推之天地間自進身交友以至應事接物
其罅漏有自其破敗有因須早見而預圖之如器然

安頓的好則久而不敝矣防于未然非救于已然知其敝所以永其終也以先事之哲為善後之圖惟是絕私情而篤公義毋若少女長男以悅而動則可耳初九歸妹以娣跛能履征吉

初有陽剛之德女之賢明者也在下而无正應故為娣之象古者諸侯一娶九女嫡夫人以姪娣所以廣繼嗣也焦氏云娣之為言第也言以次第御于君也婦人從人娣又從其從人者雖有賢德未敢直行其

意如跛者之能履也跛不能自行依人以行娣不能自行依君以行如是而行分固應爾吉之道也

象曰歸妹以娣以恒也跛能履吉相承也

以恒本義云有常久之德或曰姪娣之從古今常理曰以恒謂以常禮而行也其說甚好相承非一人之言也與諸姪娣同承順主君之命而行耳曰以恒曰相承便有寔命不猶之意小星所為作也此文衛戴嬌足以當之

九二眇能視利幽人之貞

二剛而能中正室之象進乎娣矣娣跛能履承三也
二眇能視承五也五為正應而質反陰柔其配不良
能成內助之功乎故不能遠照而晦其明以自安也
五陰柔不正動于悅者二不能為容悅惟以幽靜之
德固守正道故曰利幽人之貞傳曰二之才如是而
言利貞者利言宜于如是之貞非不足而為之戒也
本義云幽人亦抱道守正而不偶者也俱極明備

象曰利幽人之貞未變常也

傳曰守其幽貞未失夫婦常正之道也世人以媒狎
為常故以貞靜為變常不知乃常久之道也此即柏
舟之詩所謂我心匪石不可轉我心匪席不可卷者
也蓋不以配之不良而改其德也此文衛莊姜足以
當之

六三歸妹以須反歸以娣

程朱俱作待謂不正之女人莫之取故有所待也或

按天官書須賤妾也亦通三陰柔不中正而偃然居
二之上所謂狐媚專寵者也反歸謂宜出而歸之使
如初之卑巽善下以安娣媵之分可耳歸即春秋出
歸之歸與歸妹不同

象曰歸妹以須未當也

未當謂以陰居陽也柔乘剛賤陵貴之象也此如仕
者不自貴重而以事是君為容悅之類

九四歸妹愆期遲歸有時

四以陽居陰似不當位然處柔婦人之道而居上尊貴之體蓋賢明之女自守以待佳偶雖抱標梅之嘆而不遑恤也以其无正應故曰愆期以其有女德故曰遲歸有時如孟光之待梁鴻也

象曰愆期之志有待而行也

象復指出志字即志可則之志謂其心確有以自守未嘗俯仰取容也學者抱道擇主而不輕以身許人其九四之謂乎

六五帝乙歸妹其君之袂不如其娣之袂良月幾望吉
朱子以帝乙歸妹與箕子明夷高宗伐鬼方之類俱
當時占得此爻余未敢信五以中正居尊位下應九
二為王姬下嫁之象以婚姻之禮制自帝乙故推本
言之小君德冠後宮不與諸娣爭飾故其君之袂不
如其娣之袂良也漢馬后常衣大練裙不加緣朔望
諸姬至朝謁望見后袍衣疎麤以為綺縠就視乃笑
后曰此繒特宜染色故用之耳君之袂不如其娣之袂

良馬后有馬王后配月月幾望吉傳云德謙盛而不盈也本義云后德之盛无以加此玩幾字傳尤確

象曰帝乙歸妹如其娣之袂良也其位在中以貴行也

上二句直述爻辭下始解之五柔德而居中位故以其貴尚者行之所貴尚者在德不在節也

上六女承筐无實士刲羊无血无攸利

孔子曰婚禮合二姓之好以為宗廟主是故女德不

可以奉祭祀則无取焉上六以陰柔居歸妹之終而
无應傳云女歸之无終者也本義云約婚而不終者
也傳主祭祀說筐即詩維筐及筥之筐謂諸侯大夫
妻誠敬以奉祭祀之器也承筐而无蘋藻之實則女
无以奉祭祀矣按禮諸侯之祭親割牲卿大夫亦然
割取血以祭也士剝羊无血无以奉祭祀矣夫婦共
承宗廟无以奉祭祀則于義當離是夫婦之不終者
也故无所往而利本義主婚姻說女承士之筐而无

幣帛之實故士不能具酒食以召鄉黨僚友割羊无血也所以為約婚不終之象二說俱有理宜併存之胡氏曰震有虛筐象兌羊象上與三皆陰虛无應故有承筐无實割羊无血之象

謹按前說主奉祭祀于義較長蓋夫婦之道以奉祭祀為重也

象曰上六无實承虛筐也

象單解承筐句即女之无寔以該士之无血也或曰卦為歸妹設故言女而不及士



離下
震上

豐亨王假之勿憂宜日中

豐卦是極好的爻辭却不甚好以其盛極而衰也朱
子曰人君于豐之時當如捧盤水戰兢自持方无傾
倒滿溢之患若纔有纖毫自滿之心即散矣所以此
處極難豐者事事完全物物美備若天助其成者然
盛大之勢故自具有亨義也王者天下所歸往也合
天下之人民物力統歸一人惟王者可以至此故曰

王假之也其勢方隆則其為憂方大上體震震有憂
象故戒之曰勿憂勿憂與勿恤不同言其勿徒憂也
下體離離南方之卦有日中象故曰宜日中盛到極
處須常常如日中時候保護纔好不然或過或不及
皆非所宜也

彖曰豐大也明以動故豐

或曰豐盈或曰豐盛或曰豐厚豐之為義不一皆可
以大字括之離明震動相資為用故豐也

王假之尚大也勿憂宜日中宜照天下也

王假之尚大也傳曰所有既大其保之治之之道亦當大也故王者之所尚至大也蒙引云居得為之位操得為之勢而又當此得為之時凡百如意所為不期侈而自侈也故曰尚大也尚大所以有憂道也此說亦通勿憂宜日中日所以照也日中所以普天下而无遺照也有遺照則黷孽萌于其間矣故必四照如舜之明四目達四聰而後可此釋卦辭也大意已

完下又因日中一言而推極之本義所謂又發明卦辭外意是也

日中則昃月盈則食天地盈虛與時消息而況于人乎
況于鬼神乎

日中則昃如日之升則不昃月盈則食如月之恒則
不食天地盈則與時消天地虛則與時息是天地不
能違時也而況于人與鬼神乎人與鬼神有盛有衰
亦與時消息而已然而言天地又言鬼神何也天地

者鬼神之所以為體也鬼神者天地之所以為用也造化之迹如風雨露雷之類皆是也徹上徹下莫不在理數倚伏之中傳曰為此誠者欲其守中不至過盛也本義曰言不可過中也明乎此而持盈保泰之道思過半矣

象曰雷電皆至豐君子以折獄致刑

皆至雷電交作也威照並行故為豐之象君子觀其象以折獄致刑傳曰折獄者必照其情寔唯明克允

致刑者施威于姦惡唯斷乃成數語最精蓋獄以離折電之照也洞若觀火也刑以震致雷之威也德威惟畏也在此有確然曲中之情曰折謂屈服也在彼有固然應得之罪曰致謂自取也噬嗑之明罰救法則曰先王立法者也原其情而制律以示之使勿犯也豐之折獄致刑則曰君子奉法者也得其情而按律以治之使勿枉也然則二卦之分一以明在上一以明在下故也旅明在上而亦云君子何也傳曰旅

取慎用刑與不留獄君子皆當然也其義明矣

初九遇其配主雖旬无咎往有尚

初與四皆陽兩剛非應者也在豐則不然離居明之初震居動之初明與動合則有用分則无為故初遇四遇其配主也以下並上也相須猶形影相資猶表裏雖旬而无咎也旬均也盈數也明之盈者動資之動之盈者明資之何咎之有傳曰非明則動无所之非動則明无所用相資而成用同舟則胡越一心共

難則仇怨協力事勢使然也絕好名理往有尚者往而相從則能成其豐而有可嘉尚也

象曰雖旬无咎過旬災也

傳曰聖人因時而處宜隨事而順理夫勢均則不相下者常理也然有雖敵而相資者則相求也初四是也所以雖旬而无咎也與人同而力均者在乎降已以相求協力以從事若懷先已之私有加上之意則患當至矣故曰過旬災也均而先已是過旬也一求

勝則不能同矣

謹按胡氏來氏皆以旬為十日一
謂數之盈一謂日之象似亦有理

六二豐其蔀日中見斗往得疑疾有孚發若吉

傳曰明動相資乃能成豐二為明之主又得中正可
謂明者也而五在正應之地陰柔不正非能動者乃
才不足耳既其應之才不足資則獨明不能成豐既
不能豐則喪其明功故為豐其蔀日中見斗之象本
義云蔀障蔽也大其障蔽故日中而昏也或曰如樂

廣之客見杯中蛇影遂致疾蓋因疑而得疾也亦通
胡氏曰日中豈有見斗之理即睽載鬼一車之意正
與疑疾合然則畏其疑不往而遂已乎有道焉積至
誠以動之發其鄙而乎其疑可也發有感發啟發二
意感發所以化之也啟發所以開之也牖其暗而使
之明振其柔而使之強事君之善道故吉也傳曰古
人之事庸君常主而克行其道者已之誠意上達而
君見信之篤耳管仲之相桓公孔明之輔後主是也

余謂孔明允當此文管仲未也必也周公之于成王
乎

象曰有孚發若信以發志也

柔暗之君皆因志不立信以發志者不貳勿欺盟天
地泣鬼神而謂不足感動其志乎此格心本領也

九三豐其沛日中見沫折其右肱无咎

程朱本王弼說沛作旆謂幡幔也焦氏云公羊傳草
棘曰沛孟子沛澤多而禽獸至沛亦薮之義也沫子

夏以為小星薛氏謂斗之輔星故傳曰星之微小元
名數者也二說俱有理豐其沛日中見沫蔽益近而
昏益甚矣三與上六為應故也三剛正處離之上其
才足以有為上陰柔无位動終而止掣肘甚矣如人
之折其右肱也在禮子能食教以右手右便于左折
其右肱欲効一臂之力不亦難乎然上之咎非三之
咎也故原情而恕之傳作无所歸咎恐不必

象曰豐其沛不可大事也折其右肱終不可用也

凡成大事者以明為主明有所蔽則不能及遠欲濟大事其可得乎肱倚以為用斷折則无可理其終也已終不可言永為上所棄絕也士之懷才抱德未獲一售而束手坐困者此類是也

九四豐其蔀日中見斗遇其夷主吉

象與六二同二應五四承五也四居大臣之位近柔暗之君雖為動主而明无所資況不中不正乎傳曰豐其蔀蔀周圍掩蔽之物周圍則不大掩蔽則不明

日中見斗當盛明之時反昏暗也幸與初同德相應
若資之以為用戮力協心裨益非淺也下曰配不以
耦上為僭上曰夷不以就下為卑同稱主者各為一
卦之主也可以開其暗故曰吉也

象曰豐其蔀位不當也日中見斗幽不明也遇其夷主
吉行也

不中正而在高位非所宜也故曰不當位臣以陽居
陰君以陰居陰幽暗未光明也故曰幽不明同是象

也不于六二釋之而于九四釋之何也二之昏暗在五且有發蒙振懦之功有功无過故專釋有孚發若一句四不中正五之昏暗當平分焉功過各不相掩故詳釋之其義精矣傳云陽剛相遇吉之行也似以吉行為句看來遇其夷主吉爻辭也行也當為一句震體也震行則遇離之初明動相資故吉也史稱唐李吉甫不得在端亮之列位不當也謀于裴垽疏三十餘人數月之間選用畧盡當時翕然稱為得人庶

幾遇其夷主者矣

六五來章有慶譽吉

或以章為四曰五柔屈體下求四剛陰陽交錯成章也其說亦通但六二文明中正離之主也又能以誠意事君誠則形著動變而章美燦焉黻黼皇猷潤色太平此物此志也五能招徠之俾賁然來思則福慶集于身而名譽彰于外矣故吉也傳曰章美之才主二而言然初與三四皆陽剛之才五能用賢則彙征

矣如此說始无遺意訂詁又本其意而廣之曰下四
爻二應五四比五初則應四以從五者惟三為上所
排擠无由自通于五今五既來章則上六之媒孽有
所不行且將收之于廢棄之餘而資其一臂之用所
不齒者惟上耳衆賢之進如茅斯拔大奸之去如距
斯脫吉孰如之其義益暢矣

象曰六五之吉有慶也

人君為天下造福故曰有慶也天下蒙其福則有譽

不待言矣

上六豐其屋蔀其家闕其戶閔其无人三歲不覿凶
傳曰六以陰柔之質而居豐之極處動之終其滿溢
躁動甚矣處豐大之時宜乎謙屈而處極高致豐大
之功在乎剛健而體陰柔當豐大之任在乎得時而
不當位如上六者處无一當其義備矣豐其屋以所
處太高言蔀其家以所居不明言闕視也閔寂也闕
其戶閔其无人以昏暗高亢自絕于人而人莫之與

言三雖正應至于三歲之久而不得見則亦終莫之見矣凶可知也或曰自三至上歷三位故曰三歲傳曰不覲謂上不見人蓋不變也六居卦終有變之義而不能遷是其才不能也

謹按來氏謂權臣得罪披離之後多有此氣象

象曰豐其屋天際翔也闕其戶間其无人自藏也

天際翔朱子云言其屋如翬斯飛高大至于天際自藏傳承間其无人說謂人以其昏暗自高大故皆棄

絕之自藏避而弗與親也本義就上六說謂障蔽也
言上六尊大之極藏匿之深自視太尊人莫敢近豈
人之絕彼哉彼自絕乎人耳如此說更確



艮下
離上

旅小亨旅貞吉

傳曰山止而不遷火行而不居為去其所止而不處
之象本義因之或曰山止不遷有旅館象火行不居
有旅人象亦好旅无大通大行之理故曰小亨傳曰

如卦之才可以小亨得旅之貞正而吉也貞固卦所
自有也本義曰可以小亨而能守其旅之貞則吉則
似戒辭以卦德卦體觀之柔中矣而順剛內止矣而
又外明卦固具有貞義傳說正與彖傳合本義又云
旅非常居若可苟者然道无不在故自有其正不可
須臾離也名言宜服蒙引本其意而廣之曰言亦必
忠信行亦必篤敬必仁于僮僕必義于同侶必禮以
律身必智以照物其義益備矣梁溪先生謫居揭陽

嚴立課程靜坐讀書相資為用以小學近思錄教來學者可謂得旅之時義矣

彖曰旅小亨柔得中乎外而順乎剛止而麗乎明是以小亨旅貞吉也

徐氏曰一柔在外而處二剛之中是羈旅之人交于強有力者蓋離從乾變坤之一柔得上卦之中而順乎乾之二剛自不至以卑而取辱以高而招禍矣此釋小亨義徐氏又曰非賢不主非善不與止而麗乎

明也則似以止屬己以明屬人非卦德矣內艮止外
離明言靜專自守而外洞乎物情也此釋貞吉之義
旅之時義大矣哉

時義之大程朱只云難處夫難處者時也難盡者義
也二義須兼言之考戴記或旅于館或旅于途或潔
身而去或畏難而行或奉命而往或語或默或步或
趨或進或退或存或亡俱有因時徙義之道正可發
明大字之義吳氏謂旅非商旅之旅自天子諸侯大

夫以至于聖賢皆有旅故一一援其人以寔之蒙引
獨以天子之旅為未然曰天王出居于鄭變例也故
周公繫六五爻辭不取君象正以天子无旅故也若
然則魯昭公之在楚唐中宗之在房州獨非變例乎
即孔子之輶環孟子之歷聘亦自變例若得君行道
為用是栖栖者為哉大抵自天子以至于庶人皆有
旅皆有旅則皆有其時義也

象曰山上有火旅君子以明慎用刑而不留獄

本義曰慎刑如山不留如火似未盡又語錄云不干
旅事非也丘氏曰山者火之所旅久則延燒獄者囚
徒之所旅久則淹滯得之矣蓋明而不慎則必剛愎
以輕民命慎而不明則必冒昧以殘民生明慎用刑
而留獄則或以姑息養奸惡或以優柔誤善良君子
所以明慎用刑而不留獄也不留獄亦有二義元惡
大憝立置重典不至以逗遛貽意外之變一眚小過
槩從寬政不至以濡滯傷好生之恩或曰留獄猶云

懸案非留于獄中也亦通

謹按案懸則留于獄中亦必然之勢也

初六旅瑣瑣斯其所取災

初以陰柔處旅之下如商賈一流匍匐于道路計較于錙銖固瑣瑣矣若夫役役客邸俛仰苟容搖尾以乞憐亦瑣瑣也鄙猥瑣細何足道哉災之來也斯其所自取耳災謂悔辱患害也傳曰當旅困之時才質如是上雖有援无能為也四陽性而離體亦非就下

者也又在旅與他卦為大臣之位者異矣其意甚明
象曰旅瑣瑣志窮災也

象復本其志而責之凡人莫先于立志志立則雖處
窮途落窶之中而屹然自若初六之災由其志氣窮
蹙也志窮即災非別有災也

六二旅即次懷其資得童僕貞

二以柔順之德居中得正即次也有次舍可居則无
假館之勞承三之剛懷資也有財貨可畜則无稱貸

之若柔初之柔得童僕也有童僕之貞良可任則小
大一心奉命惟謹无防欺御詐之事處旅之善進退
綽綽有餘裕者也傳曰柔暗在下者童也強壯處外
者僕也又曰不云吉者旅寓之際得免于災厲則已
善矣如此始无遺意

象曰得童僕貞終无尤也

象多以上句該下亦有以下句該上者得童僕貞之
類是也即次懷資而又得童僕之貞雖厮役皆以正

道相勗則主人因而寡過矣何尤之有

九三旅焚其次喪其童僕貞厲

傳曰處旅之道以柔順謙下為先三過剛不中故全與二反居下體之上近離則焚其次无置身之地與二之即次者異矣去初遠則喪其童僕貞无奔走服役之人與二之得童僕貞者異矣羈旅之人所憑依者童僕耳失其心則舟中敵國為可危也此本傳說貞字連上句為義與六二得童僕貞一例看極是本

義則貞字連下句為義謂九三雖貞而厲也亦通
象曰旅焚其次亦以傷矣以旅與下其義喪也

焚其次則併其資而盡之困于窮途而不能前亦以
傷矣傳曰以旅之時而與下之道如此義當喪也本
義更不增減一字蓋君臣主義主僕亦然在平時且
當與下以寬而況旅乎剛而寡恩喪其義故喪其童
僕也

九四旅于處得其資斧我心不快

四以剛居柔又在上體之下得處旅之道也故曰旅
于處按詩于時處處于時廬旅則處與旅不同只是
止息之義得其資斧當如傳作兩件看陽寔為資有
所利賴也剛斷為斧有所防護也或曰資當作齎或
曰資當作齊或曰只是資用之斧俱非也資自是懷
其資之資四負剛明之才得君行道其心也徒旅于
處而已雖得資斧四何快于是我四自謂也傳曰四
以剛明之才為五所與為初所應乃旅而得貨財之

資器用之利也雖在旅為善然四非正位上无剛陽之與下惟陰柔之應故不能伸其才行其志其心不快也其說最為顯切本義全用之特約其辭耳

象曰旅于處未得位也得其資斧心未快也

四近君宜居大臣之位而乃旅處中未得位也未得位三字承上一句起下二句故下但直述爻辭非若諸象傳之各自為解也若曰惟不得位而旅處故雖得資斧未快也夫得資斧而心猶未快況甫出門而

瑣瑣乎然則四之心視初之志相去遠矣

六五射雉一矢亡終以譽命

傳曰離為雉文明之物射雉謂取則于文明之道而必合如射雉一矢而亡之發无不中則終能致譽命也譽令聞也命福祿也此理最見成但雉文明之物而亡之便是死雉何以有譽命朱子不取其說以為凡言終吉者皆是初不甚好也故以一矢亡作亡矢謂所喪不多也竊意雉得而矢將焉往若云矢雉俱

亡不應有譽命矣訂詁云亡即出亡之亡離火炎上
故有出亡象雉者文明之物射者君子之事射雉者
謂取則于文明之道如以雉為質的然離從乾變六
五舍乾之剛健而得柔之文明處得中道以斯德在
羈旅之中終必有譽命逮之雖挾一矢而出亡旅不
久矣此說斟酌程朱之間又得終字意固自有理又
曰王者无旅旅則失位故此爻不取君位象然少康
逃虞思之國宣王匿召公之家是亦旅也余謂唐自

玄宗以至肅德諸君皆嘗蒙塵而卒不失舊物可不謂旅乎此論正不可少

謹按此文說者雖俱有理但五不取君位謂天子无旅似非通論蓋易中有无其事而有其象者况寔有其事者乎試取來氏集註約言之離雉之象也錯坎矢之象也變乾居一雉飛矢亡之象也中爻兌巽兌悅也又為口以口悅人譽之象也巽以中命命之象也以用也五得中乎外而順乎四之剛又應二之中正如明皇之幸蜀肅宗之即位靈武德宗之幸奉天皆旅也可謂射雉矢亡矣後得李郭諸臣恢復故物終得其譽又得命令于天下如建中之詔是也此說于義似長併小象上逮二字亦有着落因錄存之

象曰終以譽命上逮也

傳解上逮云上下與之是多却一字朱子云不得如
伊川說是也但曰譽命聞于上恐亦未安訂詁曰逮
及也以臣言則譽命者君所予以君言則譽命者天
所予皆從上而及者也其說亦通

上九鳥焚其巢旅人先笑後號咷喪牛于易凶

離為飛鳥上九剛不中而處最高又離體故取鳥象
離為科有巢象而火又附焉有焚巢象鳥焚其巢則
失其安而无所止矣特加旅人二字所以別于鳥也

旅人始以高亢鳴得意先笑也失安莫與求旅于次
旅于處不可得後號咷也牛順物任重致遠旅所必
賴也輕率躁慢則喪其順而无以為力矣困于旅故
凶也離為牝牛又離火性上為躁易之象故曰喪牛
于易

象曰以旅在上其義焚也喪牛于易終莫之聞也

義者宜也旅之義宜下不宜上以旅在上高亢而不
保其居故其義當有焚巢之事也凡事着一番畏難

意思則始迷尚期終悟一味輕易視天下事无足以入其心者聽之不聰其終也已又安望其有聞知乎謂終身无覺悟之期也或曰浪迹天涯悠忽度日終不能有聞于世也亦通梁溪曰夫子去魯十有四年與二三子棲遲容與其進德修業有不可知之妙所以贊易大旅之時義



巽小亨利有攸往利見大人

傳曰一陰在二陽之下巽順于陽所以為巽也本義
又加入字曰一陰伏于二陽之下其性能巽以入也
象為風亦取入義其義愈詳矣陽大陰小以其從陽
也故亨以其從陽者陰也故曰小亨一陰上從二陽
初往二四往五无不利者故曰利有攸往初見九二
之大人四見九五之大人皆能以陽剛之德濟陰柔
之質引而入于中正之域也故曰利見大人

彖曰重巽以申命

合兩巽為卦故曰重巽傳曰君子體重巽之義以申復其命令故本義曰釋卦義也申重復也丁寧反覆之意非謂有兩命也讀書盤庚及多士多方之誥則可見矣

剛巽乎中正而志行柔皆順乎剛是以小亨利有攸往利見大人

陽性以中正為志剛而巽乎中正其志行矣本義指九五以二中而未正也鄭氏曰九二巽乎中者也重

巽則兼五言之故曰巽乎中正而志行如此則分曉
矣又曰初六順乎剛者也重巽則兼四言之故曰柔
皆順乎剛尤分曉蓋順乎剛則不至柔媚而為諂剛
順乎中正則不至褊急而為邪此巽之所以為巽而
小亨利有攸往利見大人者也

象曰隨風巽君子以申命行事

傳曰隨者相繼之義本義因之蓋巽為風風以繼風
故曰隨風重巽之象也君子觀重巽之象以重申其

命而又必行其所命之事不徒託諸空言也李氏曰
天下有風姤所以施命若風相隨而至則是申命不
一之象故君子之出命也必至再至三以先戒之然
後其事可行于天下也文告勤懇而非出乎身以加
諸民雖家諭戶曉祇故事耳勵精圖治而不能使匹
夫匹婦丕應侯志即發號施令何為也哉必如君子
之德風而後可以申命行事也

初六進退利武人之貞

巽為進退為不果初以陰柔而居最下故有此象然
利在武人之貞者所以鼓勵其志使之有進而无退
也本義有以濟其所不及而得所宜句最精

象曰進退志疑也利武人之貞志治也

進退兩念交戰于胸中而不能自決志疑也把狐疑
念頭整頓起來不使污壞卑萎了志治也志治則確
然自信而无所疑矣傳曰治謂修立也修者不汙之
謂立者不卑之謂

九二巽在牀下用史巫紛若吉无咎

二以陽居陰而在重巽之下過于巽者也故曰巽在牀下古尊者坐于牀上卑者俯伏拜跪于牀下正其義也用史巫紛若句殊難理會向來以程朱為未安遍求諸家之說畢竟傳義較勝傳曰史巫者通誠意于神明者也紛若多也苟至誠安于謙巽能使通其誠意者多則吉而无咎謂其誠足以動人也由此言之如古之人有盛德及人而人皆代為祈福之類蓋

至誠感人而因以格神也用史巫者史巫為二用非
二用之也本義丁寧煩悉其辭以自道達亦未確余
向有說云史用以占卜者也巫用以禱祀者也紛若
者史不已而巫巫不已而史極言其小心慎畏不安
之甚也誠敬如此可通神明是以吉而无咎也亦通
存之

象曰紛若之吉得中也

傳曰二能使其誠意者衆多紛然由得中也陽居中

為中寔之象中既誠寔則人自當信之以誠意則非
諂畏也所以吉而无咎此說確不可易

九三頻巽吝

三以陽居陽過剛不中者也因處巽時而勉強以下
人非其本心然巽豈可以聲音笑貌為哉故頻巽而
頻失為可吝也

象曰頻巽之吝志窮也

傳曰三之才質本非能巽而上臨之以巽承重剛而

履剛勢不得行其志故頻失而頻巽蓋巽者本非其志故窮困而不能常也

六四悔亡田獲三品

陰柔无援承乘皆剛宜有悔也以陰居陰在上體而能下故悔可亡田獲三品傳云遍及上下也朱子以爲牽強但直作卜田之吉占恐未然焦氏云三品指下三爻四居五下巽順而盡事君之禮故初六九二九三莫不巽順之如田獵而有三品之獲也此說亦

通三品之說舊矣一為乾豆一為賓客一以充君之庖又有三殺之說詩車攻篇自左膘達右膋為上殺達右耳本為中殺左脾達右肫為下殺此即就田時所獲言之猶切

象曰田獲三品有功也

四居柔得正所謂範我馳驅者故有田獵之功豈與詭遇獲禽等乎以陰柔之才而遇上下之剛獲免于悔幸矣乃不惟无悔而且有功傳曰天下事苟善處

則悔或可以有功也

九五貞吉悔亡无不利无初有終先庚三日後庚三日

吉

五居尊位為巽之主命令之所自出也以剛健之德
居中正之位所謂剛巽乎中正而志行者也故貞貞
則吉而悔亡无所不利矣五非有悔而居巽體巽為
疑卦故戒之以其不善而變也故无初以其變而善
也故有終所謂圖惟厥終也本義曰有悔是无初也

亡之是有終也尤為明切先庚三日後庚三日傳曰
甲者事之端也庚者變更之始也十干戊己為中過
中則變故謂之庚事之改更當原始要終如先甲後
甲之義如是則吉也本義云先庚三日丁也後庚三
日癸也丁所以丁寧于其變之前癸所以揆度于其
變之後二義俱不可少然先庚後庚反覆告人以欲
變之意不一而足所謂重巽以申命也以此創制變
法必獲美善之道吉可知已

象曰九五之吉位正中也

二曰得中未正也五曰位正中則无偏无黨无過无不及命令之出合天理而當人心矣故吉有獨歸焉上九巽在牀下喪其資斧貞凶

上以剛居柔而處巽之極過于巽者也故與二同象失其所安矣資斧在旅作兩件看在巽作一件看盖旅之時以懷其資為善故二物併需巽之時只取斷義喪其資用之斧失其所以斷也上九本剛非不能

斷者特以巽極而喪之耳故只作一物易不可為典
要也貞凶傳曰在正道為凶是也本義曰雖正亦凶
亦說的去


象曰巽在牀下上窮也喪其資斧正乎凶也

居巽上而在牀下窮而反下也故曰上窮正乎凶也
本釋貞凶二字本義直云必凶恐未是傳曰巽本善
行故疑之曰得為正乎復斷之曰乃凶也如此方是
釋辭且得乎字也字意出楊氏曰上九位極人臣愛

其富貴權勢而患失之心生故以極其巽順阿譽以保其所有若然則漢張禹唐魏元忠盖其人矣

謹按此卦語多難解徧考諸家之說明白曉暢者絕少竊嘗臆揣之其所謂牀者象其形也巽一陰在下二陽在上牀之象也重巽疊牀之象也九二性主于入而上无正應故比于初巽在牀下之象也中爻上離為龜史所掌也下兌為巫祝所用也二雖陽剛在巽為不果紛若之吉教以決斷奮發不溺于下而返于上則得中而无咎也九三亦无正應且一巽方盡一巽復來故頻巽而窮吝也六四以柔居柔在中爻之兌悅以入之故田獲而有功也三品之說依本義為是來氏之說雖卦象皆有但雞羊皆家畜非田所獲者故不可從九五无初有終亦以二非正應而能相入之意上九居巽之極下應九三亦巽在牀下之

象巽為近利市三倍資之象也極則必變上變六成
坎為盜喪其資斧之象也變六雖成正應但坎為盜
又水亦就下之物所以正乎凶也一隅之
見不知有當萬一否存之以質明經者



易酌卷九